

ՎԱՍՊՈՒՐԱԿԱՆԻ ՔԱՂԱՔԱԿԱՆ ԱՄԲՈՂՋԱՅՈՒՄԸ (VIII Դ.)

Վ. Մ. ՎԱՐԴԱՆՅԱՆ

VII—VIII դդ. սահմանագծին Վասպուրականը բաժանված էր մի քանի կիսանկախ իշխանությունների, որոնց իշխանները վարում էին հաճախ երկրամասի ընդհանուր շահերին չհամապատասխանող քաղաքականություն: Մինչև VIII դ. սկզբները Վասպուրականի նշանավոր տոհմերն էին Ռշտունիները և Բագրատունիները: Վերջիններս Հայաստանում որոշակի գերակշռություն ունեին Վասպուրականում: 691 թ. Հայաստանի կառավարչի պաշտոնում վերստին տեսնում ենք Բագրատունի իշխանի՝ Սմբատ Բյուրատյանին, որի օրոք Արմինիայի առաջին ոստիկան Մուհամմադ իբն-Մրվանը (693—706) զորքով Միջագետքից մտավ Հարավային Հայաստան և հասավ Մոկաց Զեքմաձոր գավառը: Թեև նախարարները գիտեին այդ հարձակման մասին և ապաստանել էին բերդերում, այդուհանդերձ՝ նա խորամանկությամբ իրար ետևից գրավեց դրանք ու բնակչությանը մեծ բռնությունների ենթարկելուց հետո անցավ Ասորիք: Բռնադատված «բնակիչք աշխարհիս մնացին իբրև զխանձող ծխեալ ի հրոյ և իբրև զօրան վանակ փխրեալ զոր առ ոտն կոխեալ խոզից»¹: Մեկնելով Ասորիք, Մուհամմադ իբն-Մրվանը Արմինիայի փոխկառավարի թողեց Աբու Շայխ իբն Աբդալլահին (703—704), որը ևս, Ղևոնդի վկայությամբ՝ կամենում էր ոչնչացնել հայ իշխաններին: Արաբների այս խստությունը պայմանավորված էր նրանով, որ նույն ժամանակ Աբդալ Մալիքի բարեփոխումներով ավարտվեց արաբական հսկայածավալ պետության կազմավորումը² և նվաճումներին պետք է հաջորդեր նվաճված երկրների շահագործման կատարելագործումը: Հենց այդ ժամանակ էլ կազմավորվեց Արմինիա վարչական միավորը՝ բաղկացած չորս մասից: Վասպուրականը մտնում էր III Արմինիայի կազմի մեջ³: Այս վարչական բաժանումը մասնատում էր հայոց ռազմական ու տնտեսական կարողությունները ողջ երկրի մասշտաբով, սակայն առանձին նահանգների զինական և տնտեսական ուժերը չէր տարաբաժանում:

Օմայանների օրոք տեղական կառավարիչները ոչնչով չսահմանափակվող կամայականություններ էին ցուցահանում բնակչությունից հարկեր գանձելու համար, հարկման ենթարկելով նաև մահմեդականներին⁴: Հայ իշխանների հանդեպ դրսևորած դաժանությունները ևս նպատակ ունեին դյուրացնել հարկահանությունը:

¹ «Պատմություն Ղևոնդի ա Մեծի վարդապետի հայոց», Ս. Պետերբուրգ, 1887, էջ 22:

² W. Muir, The Caliphate its rise, decline, and fall, Edinburg, 1924, p. 350—362

³ «Сборник материалов для описания местностей и племен Кавказа», вып. XXXI. Тифлис, 1902, стр. 11—12.

⁴ Е. А. Беляев, Арабы, ислам и арабский халифат в раннее средневековье, М., 1966, стр. 192.

Հայ նախարարների հանդեպ բռնության քաղաքականությունը գտավ իր արձագանքները: Նրանք Սմբատ Բյուրատյանի գլխավորությամբ խորհում են «հնարս գտանել, որով մարթասցեն զանձինս ապրեցուցանել»⁵: Նախարարների մի մասը գերադասեց լքել հայրենիքը և ապաստանել Բյուզանդիայում: Վասպուրականի նախարարները Սմբատ Բագրատունու (Բյուրատյանի) և Վարդ Պատրիկ Ռշտունու գլխավորությամբ չհետևեցին Հայաստանից հեռացող նախարարներին, որոնց պարագլուխն էր Սմբատ Բագրատունին: «Եւ անդէն,— դրում է պատմիչը,— անջատեալ, մեկնեցան ոմանք ի նախարարաց Վասպուրական աշխարհին» և «գէմ եղեալ զնացին ի կողմանցն Վասպուրականի ի դաշտավայր մարդէն, որում Առեստակողմն կոչեն»⁶: Սակայն, ինչպես երևում է պատմիչի հաղորդումից, Վասպուրականի նախարարները չեն ունեցել գործողության կանխորոշ ծրագիր և մեկնել են ինչ-որ միայնակյացի մոտ՝ «հարցանել զորպիսութիւն գործոյն»⁷: Վերջինս առ ինչ կարէր հրամայել. այլ միայն անձնապահ լինել և զգուշանալ ի նենգութենէն»⁸:

Սմբատ Բագրատունու գլխավորած նախարարներն անցան Արաքսի աջ ափը և Վարդանակերտ գյուղում ջարդեցին Նախճավանի արաբական կայազորը, որը փորձում էր խանգարել նրանց՝ անցնելու Բյուզանդիա: Վասպուրականում մնացած հայ աղատազորքի վրա նույն ժամանակ հարձակվում է մեկ այլ արաբական հրոսախումբ (Վասպուրականի Գուկանք գավառի Գուկանք գյուղում): Վասպուրականի համեմատաբար փոքրաթիվ զորքը Սմբատ Բագրատունու գլխավորությամբ հաղթում է թշնամուն⁹: Ո՞վ էր այս Սմբատը: Ղեկնողը նույն անցքերի ժամանակ հիշատակում է երկու Բագրատունի Սմբատների, որոնք պատմագիտական գրականության մեջ հաճախ նույնացվել են: Մինչդեռ առաջինը Սմբատ Վարազտիրոցի որդին է, երկրորդը (Վասպուրականում գործող)՝ Աշոտ Բյուրատյանի¹⁰:

Այսպիսով, արաբական ճնշումը Վասպուրականի հայ իշխաններին հարկադրում է միաբանել: Սակայն ոչ բոլոր տոհմերն են համախմբվում Սմբատ Բյուրատյանի շուրջը, որի մասին վկայում է վասպուրականցիների զորքի փոքրաթիվ լինելը: Այնուամենայնիվ, միավորման փաստն առկա էր, որը և անհանգստացնում էր արաբներին: Վարդանակերտի և Գուկանքի դեպքերը ավելի սրեցին հայ նախարարների և ոստիկանի փոխհարաբերությունները: Վարդանակերտի ճակատամարտին մասնակից հայ նախարարները փրկվեցին հաշվեհարդարից, քանի որ անցան Ծգերք, իսկ Վասպուրականի նախարարները մնացին երկրում: 704 թ. վերստին Հայաստան վերադարձած ոստիկան Մուհամմադը վճռեց պատժել հայ նախարարներին: Սակայն, քանի որ մի կողմից պատժվողները հիմնականում Վասպուրականի իշխաններն էին և մյուս կողմից՝ ոստիկանը վախենում էր, որ հաշվեհարդարը կարող է խալիֆին դուր չգալ, պատժելու գործը հանձնարարեց Կասիմին, որը ոստիկանի փոխանորդն էր Վասպուրականի հյուսիս-արևելյան շրջաններում և, անշուշտ,

⁵ «Պատմութիւն Ղևնդեայ», էջ 23:

⁶ Նույն տեղում:

⁷ Նույն տեղում:

⁸ Նույն տեղում:

⁹ Նույն տեղում, էջ 27:

¹⁰ J. Marquart, Osteuropäische und ostasiatische Streifzüge, Leipzig, 1903, s. 443, 449.

առանձնակի շահադրգովածություն ունեւր դրանում: Կասիմը իր մոտ՝ Նախնավան է հրավիրում նախարարներին և ողջակիզում¹¹: Գալիս են հիմնականում Վասպուրականի նախարարները, որոնցից Ղևոնդը հիշում է չորս տոհմի ներկայացուցիչների՝ Սմբատ Բյուրատյանին, Գրիգոր և Կորյուն Արծրունիներին, Վարազ Շապուհ Ամատունուն ու իր եղբորը¹², Իսկ Սամվել Անեցին պարզապես դրում է. «Կասմ ամիրայ՝ Ղվասպուրականի իշխանսն կոտորեաց»¹³: Վասպուրականի իշխաններին հիշում է նաև Ստեփանոս Տարոնեցին¹⁴, Հայ նախարարների ողջակիզումը իրականում ոստիկանի և նրա փոխանորդի մտահղացումն էր, որը հավտնություն չգտավ խալիֆի կողմից և ցնցեց ոչ միայն հայերին, այլև արաբներից ոմանց: Արաբ մատենագիր Տաղրիբբեդին այդ տարին անվանում է «հրկիզման տարի»¹⁵, իսկ իֆրե հայերին սիրաշահելու համար Արմինիա ու զարկեց նոր ոստիկան՝ Արդ ալ-Ազիզին (706—709): Վերջինս վերաշինեց Դվինը, Հայաստան հրավիրեց վտարված նախարարներին, որոնք վերստացան իրենց իրավունքները: Հայ մատենագիրների վկայությամբ¹⁶ հայերի հանդեպ լավ վերաբերմունք ունեւր նաև Օմար խալիֆը (717—720): Սակայն Հիշամ խալիֆի օրոք (724—743) դրությունն արմատապես փոխվեց: 725 թ. Հայաստանում հարկման ենթարկվեցին թե՛ մարդիկ, թե՛ հողերը և թե՛ անասունները: Հարկման ուժեղացումը բնականաբար ուղեկցվում էր քաղաքական մթնոլորտի ծանրացմամբ:

Այսպիսի պայմաններում Սմբատ Մամիկոնյանի որդիները՝ Գրիգորը և Դավիթը, Մրվան իբն Մուհամմադ ոստիկանի (732—750) կողմից ազատվեցին բանտարգելությունից և վերադարձան Հայաստան՝ «ի կողմանս Վասպուրական աշխարհին»¹⁷: Վասպուրականում Մամիկոնյան եղբայրների հանգրվանելը պատահական չէր: Նրկրում խալիֆայության դրածոների հարուցած կամայականություններն ու հարկային բռնությունները խոր դժգոհություն մար էին համակում նաև վասպուրականցիներին: Հայ նախարարների ողջակիզումից հետո (705) Վասպուրականի Բագրատունիները քաղաքական ասպարեզից վերացան, իսկ մյուս տոհմերը՝ տակավին թույլ էին: Հակաարաբական և հակաբագրատունի տրամադրություններ ունեցող Մամիկոնյանների համար Վասպուրականն այն ասպարեզն էր, որտեղ նրանք կարող էին փրագործել իրենց քաղաքական նպատակները: Եվ իրոք, նրանց սկզբում հաջողվում է իրենց շուրջը համախմբել Վասպուրականի իշխանների զգալի մասին: Հավանաբար Վասպուրականում գերիշխանություն հաստատելու հա-

¹¹ Արաբ հեղինակները նախարարների այրման վայրն են համարում Խլաթը («Արաբացի մատենագիրը Հայաստանի մասին», Վիեննա, 1919, էջ 105—106),

¹² «Պատմութիւն Ղևոնդեայ», էջ 34—35:

¹³ «Սամուելի քահանայի Անեցւոյ, Հաւաքմունք ի գրոց պատմագրաց», Վարդապատ, 1893, էջ 85:

¹⁴ «Ստեփանոս Տարոնեցւոյ Ասողկան Պատմութիւն տիեզերական», Ս. Պետերբուրգ, 1885, էջ 124—125:

¹⁵ Հ. Նալբանդյան, Արաբացի ոստիկանները Հայաստանում (ՀՄՍՀ ԳԱ «Տեղեկագիր», 1956, № 8, էջ 108):

¹⁶ «Պատմութիւն Ղևոնդեայ», էջ 42, Թովմա Արծրունի, Պատմութիւն տանն Արծրունեաց, Թիֆլիս, 1917, էջ 179: Այս խալիֆը նույնիսկ հրաման արձակեց, ըստ որի ոչ մի մահմեդական իրավունք չունեւր բուն Արաբիայից գուրս ձեռք բերել անշարժ գույք և զբաղվել երկրագործությամբ (А. М ю л л е р, История ислама, т. I, С. Петербург, 1895, стр. 302):

¹⁷ «Պատմութիւն Ղևոնդեայ», էջ 118—119:

մար Մամիկոնյանների ձեռնարկած քայլերին հակառակորդներ են տեղացի ուրոշ իշխաններ, որոնց մեջ կարող էին լինել թե՛ Աշոտ Բագրատունու կողմնակիցները և թե՛ ընդհանրապես ոչ մի գերիշխանություն չճանաչելու հակավածները: Որ իրոք Մամիկոնյանները հարոցում են նաև վասպուրականցիների մի մասի դժգոհությունը, երևում է Ղևոնդի այն հաղորդումից, ըստ որի Գրիգոր և Դավիթ Մամիկոնյանները Վասպուրականում «խոշտանգանս և տազնապ մեծ յարուցանէին ի վերայ երկրին. և հարկապահանջ բռնութեամբ վտանգէին զնոսա»¹⁸:

Մամիկոնյանների ինքնակամ գործողությունները խորապես դժգոհեցրին նաև Աշոտ Բագրատունուն, որին խալիֆայությունը վստահել էր Հայաստանի կառավարչությունը, նա Մամիկոնյան եղբայրներին Վասպուրականից և ընդհանրապես քաղաքական ասպարեզից դուրս վանելու միտումով, մեկնեց Ասորիք՝ Մովսիս խալիֆի մոտ: Մամիկոնյան եղբայրները, որոնք իրենց հերթին հետաժուտ էին Աշոտ Բագրատունուն ասպարեզից հեռացնելուն, օգտավետ լուր տարին, կարողացան համոզել Արմինիայի ոստիկան Իսահակ իրն Մուսլիմին (Մուսլիմ) հայոց իշխան կարգել Գրիգոր Մամիկոնյանին¹⁹: Հավանաբար Մուսլիմը նույնպես լավ չէր տրամադրված Աշոտի նկատմամբ և կամենում էր պառակտել հայոց ուժերը: Սակայն Մովսիսը Հայաստանի կառավարչի պաշտոնում վերահաստատեց Աշոտ Բագրատունուն և գլխատել տվեց Դավիթ Մամիկոնյանին: Թեև Մամիկոնյանները Բագրատունիների դեմ պայքարում էին պատճառաբանելով նրանց արաբական կողմնորոշումը, բայց հարմարադեպ պահին իրենք էլ հակվեցին դեպի արաբ կառավարիչը²⁰:

Հայաստանի արաբ կառավարչի սատարմամբ Գրիգոր Մամիկոնյանի հայոց իշխան դառնալը վկայում է, որ Մամիկոնյան եղբայրներն այս ժամանակ պայքարում էին առաջին հերթին Բագրատունիների դեմ՝ իրենց իրավունքների ընդլայնման միտումով: Նրանց պայքարն ուղղված էր արաբների դեմ այնքանով, որքանով վերջիններս զորավիգ էին Բագրատունիներին: Արաբները չէին վստահում բյուզանդական կողմնորոշում ունեցող հայ իշխաններին, որոնց թվում էին Մամիկոնյանները: Մինչդեռ Բագրատունիները հետըզհետե ձեռք էին բերում արաբների վստահությունը: Ուշագրավ է, որ 745 թ. Իսահակ իբն Մուսլիմը հեռացվեց Արմինիայի ոստիկանի պաշտոնից: Նոր ոստիկան Մուսաֆիր իբն Վազիրի օրոք ևս Մամիկոնյաններն ի զորու չեղան երկրորդական դիրքեր մղելու Բագրատունիներին:

Վերոշարադրյալից պետք է նաև մակաբերել, որ տվյալ շրջանում Վասպուրականի քաղաքական ամբողջացումը տակավին հնարավոր չէր իրականացնել, քանի որ տեղի իշխանական տոհմերից ոչ մեկը մնացած տոհմերի նկատմամբ չունեի կայուն գերիշխանություն: Սրա հիմնական պատճառը ֆեոդալական ներհակություններն էին, որոնք արաբական տիրապետության

¹⁸ Նույն տեղում:

¹⁹ Այս պետք է տեղի ունեցած լինի 745 թ., քանզի Իսահակ իբն Մուսլիմը Արմինիայի կառավարիչ է եղել միայն այդ թվականին (Հ. Նալբանդյան, նշվ. աշխ., էջ 110):

²⁰ Դեպքերի էությունից դատելով՝ խոսք չի կարող լինել VІІІ դ. կեսերին Հայաստանում (մասնավորապես Վասպուրականում) հակաարաբական ապստամբության մասին: Ծիշտ է, արաբ պատմիչ Յակուբին հաղորդում է, թե հայերը 744 թ. սպանում են Արմինիայի կառավարիչ Ասիմ իբն Արզալահին, սակայն այս սպանության տարածանքը որոշակի չեն, քանի որ այդ մասին հաղորդում է միայն Յակուբին, որը դեպքերին ժամանակակից չէ, իսկ հայ աղբյուրներն էլ ոչինչ չեն հաղորդում:

պայմաններում ունեցան նորանոր դրսևորումներ: Վասպուրականի մեկ միասնական իշխանության վերածվելու ճանապարհին լուրջ խոչընդոտ էր Հայաստանում հաստատված արաբ գաղթականությունը: VIII դ. առաջին կեսին Հայաստանի կարևոր կենտրոններում հաստատվեցին արաբական կայազորներ: Ծիշտ է, վերջիններիս հիմնական նպատակը պայքարն էր Բյուզանդիայի դեմ²¹, սակայն անհրաժեշտության դեպքում այդ պայքարն ուղղվում էր նաև ընդդիմադիր հայ իշխանների դեմ: Արաբական տարրը հատկապես ուժեղ էր Վանա լճի շրջակայքում²², Հ. Մարկվարտի կարծիքով՝ Գողթները և Նախճավանը Վահան Գողթնացու նահատակումից հետո (737) դարձել են մահմեդական ամիրայություն²³, Սակայն Գողթներ հայերի իրավասության տակ է եղել հավանորեն մինչև X դ. սկիզբը²⁴:

Հարավային Հայաստանի նախարարների մեջ որոշակի արմատներ էր գցել արաբական կողմնորոշումը, որը նրանց դիրքերի պահպանության լավագույն գրավականն էր: Արաբները շարունակում էին առաջնությունը տալ Բագրատունիների այն ճյուղին, որը մնացել էր Հարավային Հայաստանում: Ղևոնդը գրում է, որ «Եզդիտ կացուցանէր ի վերայ աշխարհիս իշխան ի նախարարացն Հայոց զԲասակ որդի Բագարատայ ի նոյն տանէն իշխանին Աշոտոյ, որ էր որդի հօրեղբօր նորա»²⁵:

Աբբասյան խալիֆայության հաստատումը նշանավորվեց Օմայյանների հետ քիչ թե շատ մերձակցություն ունեցած ուժերի մեկուսացմամբ կամ հաշվհարդարով: Նույնիսկ Իրանը, որտեղից ծագել էր հակաօմայյան շարժումը, զերծ չմնաց դրանից: Օմայյաններին գործակցելու պատճառով պարսից ազնվականության որոշ մասը սրի քաշվեց²⁶: Աբբասյանների օրոք Հայաստանը նույնպես տուժեց Օմայյաններին համագործակցելու պատճառով²⁷, Հայաստանը մեծապես վնասվեց նաև արաբա-բյուզանդական զինաբախումներից: VIII դ. կեսերին արաբները պարբերաբար հարձակումներ էին գործում Բյուզանդիայի վրա, որից տուժում էր կողմերի երկրագործ բնակչությունը: Հատկապես ծանր էր իրավիճակը 760-ական թվականներին²⁸, Աբբասյանների օրոք ստեղծված դառնազետ պայմաններում Վասպուրականի նախարարների զգալի մասը կամ անհետանում է քաղաքական ասպարեզից, կամ էլ համախմբվում հետզհետե գերազդեցիկ դիրքեր ձեռք բերող Արծրունիների շուրջը: Դրա պատճառներից մեկն էլ այն էր, որ 705 թ. հետո Վասպուրականում ասպարեզից վերացան Ռշտոնիները²⁹, որպես ոստիկանի իշխանությանը հակաանդրոթողներ³⁰:

²¹ Ա. Տեր-Ղևոնդյան, Արաբական ամիրայությունները Բագրատունյաց Հայաստանում, Երևան, 1965, էջ 43:

²² J. Markwart, Südarmenten und die Tigrisquellen, Wien, 1930, s. 98.

²³ Նույն տեղում, էջ 99:

²⁴ Ա. Տեր-Ղևոնդյան, նշվ. աշխ., էջ 130—131:

²⁵ «Պատմութիւն Ղենդեգայ», էջ 128:

²⁶ А. Мюллер, История ислама, т. II, стр. 140—142:

²⁷ H. Daghbachean, Gründung des Bagratidenreiches durch Aschot Bagratuni, Berlin, 1893, s. 56.

²⁸ G. Fineay, History of the Byzantine Empire, London, 1856, p. 60—61.

²⁹ J. Markwart, Südarmenten, s. 79.

³⁰ Հավանաբար Ռշտունիների մնացորդները դրանից հետո ձուլվել են Արծրունիներին՝ կրելով նրանց տոհմանունը: Նույնիսկ ավելի վաղ շրջանի Ռշտունիները երբեմն հորջորջվում

Հարավային Հայաստանի Բաղրատունիները VIII դ. կեսերից Արծրունիների կողմից վերջնականապես դուրս են մղվում Վասպուրականից, իշխելով Մոկեքում և Տարոնում: Այդ մասին է վկայում այն, որ դրսեկ ցեղերի դեմ Վասպուրականի պաշտպանությանը զլխավորում են արդեն Արծրունիները: 754 թ. գարնանը Ատրպատականի կողմերից ոման Սուլեյմանի զխավորությամբ մի հրոսախումբ է ներխուժում Վասպուրական, «գործելով զանարժան բարս սննդակից շար սերմանցն»³¹, Դրանց դեմ են դուրս դալիս Վասպուրականցիները՝ Վահան Արծրունու որդիներ Սահակի և Համազասպի զլխավորությամբ, որոնք զոհվում են անհավասար մարտում³², Որ իրոք Վասպուրականի պաշտպանության գործը կազմակերպում էին Արծրունիները, երևում է նաև նրանից, որ հիշյալ հրոսախմբին հետագայում հակահարված է տալիս նահանգի ազատանին, դարձյալ Արծրունի իշխանի՝ Գագիկի, զլխավորությամբ, որին Ղևոնդը հորջորջում է «տէր Արծրունեաց տանն»: Գագիկն ամրանում է նկան ամրոցում, իր շուրջը համախմբելով «զնախարարս աշխարհին նոցին հեծելովք» և ասպատակներ սփռում Ատրպատականում ու Զարեանդում³³, Թշնամուն միասնական հակահարված տալու պարագան վրկայում է Վասպուրականի ուժերի համախմբման մասին:

770-ական թթ. Վասպուրականի քաղաքական ամբողջացումն ավելի հաստատուն է դառնում: Արծրունիները զլխավորում են Վասպուրականի նախարարներին նաև 774—775 թթ. ապստամբության ժամանակ: «Նախարարք տանն Արծրունեաց Համազասպ և եղբարք իւր և զօրք նորին մնացին անդէն ի կողմանս Վասպուրական աշխարհին. և Վասակ որդի Աշոտոյ և որք ի տոհմէ Ամատունեացն և Տրունեաց՝ մնացին անդէն»³⁴, Վասպուրականի նախարարներն ամրանում են բերդերում: Այնուհետև, գրում է պատմագիրը, «գումարէին նախարարք ազգին Արծրունեաց զզօրս Վասպուրական աշխարհին, Համազասպ և եղբարք իւր և որք ի տոհմէ Ամատունեաց և զօրքն որ ընդ նոսա»³⁵ և շարժվում են Արճեշի վրա, օգնության կանչելով Աշոտ Բագրատունու որդի Վասակին (Սմբատ սպարապետի եղբորը): Ընդսմին, Բագրատունյաց որոշ գործիչներ խալիֆայության կողմը հակված լինելու պատճառով վստահություն չէին ներշնչում Վասպուրականի ապստամբներին: Սահակ Բագրատունու որդի Աշոտը, որ գտնվում էր Խլաթում, թեև Վասպուրականի նախարարներին իմաց է տալիս արաբ ղրքի ժամանման մասին, սա-

են «Արծրունի»: Այսպես, մի «Ոսկեփորիկում» Թեոդորոս Ռշտունին անվանված է «իշխան Արծրունեաց» (Շ ա պ ու Ն Բ ա գ ր ա տ ու ն ի, Պատմութիւն, էջմիածին, 1921, էջ 25): Հովհան Մամիկոնյանը Վարդ Պատրիկ Ռշտունուն անվանում է «իշխան Արծրունեաց» (Հ ո վ հ. Մ ա մ ի կ ո ն ե ա ն, Պատմութիւն Տարօնոյ, Երևան, 1941, էջ 149, նաև Ե. Լ ա լ ա յ ա ն, Ցուցակ հայերեն ձեռագրաց Վասպուրականի, I, Թիֆլիս, 1915, էջ 318):

31 «Պատմութիւն Ղևոնդեայ», էջ 130, Հ. Տ ա շ յ ա ն, Ցուցակ հայերեն ձեռագրաց Մատենադարանին Մխիթարեանց, Վիեննա, 1895, էջ 40:

32 «Պատմութիւն Ղևոնդեայ», էջ 130:

33 Նույն տեղում, էջ 131, Ս տ ե փ ա ն ս ս Տ ա ր ո ն ե ց ի, էջ 133:

34 «Պատմութիւն Ղևոնդեայ», էջ 144:

35 Նույն տեղում, էջ 146: Ղևոնդը գրում է, որ Վասպուրականի հայ ազատանին կասկածում էր, թե Աշոտ Բագրատունին «դաւող խորամանկութեամբ կամի փրկել զքաղաքն ի պաշարմանէ անտի, իւր մտերիմ զինքն ցուցանել իսմայելացւոցն» (Ղևոնդ, էջ 146): Կասկածանքի հիմքում կարող էին լինել Արծրունիների և Բագրատունիների միջև եղած հակասությունները Հարավային Հայաստանում գերիշխանության հարցում:

կայն նրանք հավատ չեն ընծայում նրան և «զառաջի արկեալն իւրեանց խոկային կատարել»³⁶:

Վասպուրականի ապստամբների հավաքականն է դառնում Առքերանի դավառի Բերկրի ավանը, որտեղ հավաքվում են ոչ միայն նախարարները, այլև ռամիկները: Բերկրիում ապստամբների ղեկավար Համազասպ Արծրունին տեղեկանում է, որ հլաթ է ժամանել արաբական մեծաթիվ զորք, որը սպասում է ապստամբ հայերի հարձակմանը: Սակայն, գրում է պատմիչը, Վասպուրականի ազատագործն այնքան էր լցված հաղթելու կամքով, որ Համազասպը հարվածում է գուժաբերին, «իբրև զհրապուրիչ ստույթնան. և ինքն խրոխտացեալ զնաց ի վերայ Արճեշն աւանի հանդերձ զօրոքն իւրովը»³⁷: Վասպուրականի ազատանին կամենում էր Վանա լճի ոլորտից դուրս վանել նորեկ արաբական տարրը, ապահովել Վասպուրականի անվտանգությունը: Գնունիների, որպես Արծրունիների ազգակիցների, տիրույթները վտանգից զերծ պահելու կանխահոգությունը նույնպես դեր ունի (Բերկրիում ազատագործի գումարելը, անշուշտ, պատահական բայլ չէր): Սակայն տեղի արաբները հլաթի արաբական կայազորի հրամանատար Ամրին իմաց են տալիս հայերի զորաշարժի մասին: Ամրը դարանամուտ է լինում Արճեշի մոտ: Երբ ապստամբները գալիս են դեպի Արճեշ, Ամրի զորքը թաքստոցից հարձակվում է նրանց վրա, կոտորելով «զմեծն մասն հետեակ զօրուն, որ յաշխարհաբնակ մարդկանէն էին...», մերկք և առանց զինուց և անհմուտք պատերազմի»³⁸: Նախարարներից զոհվում են չորս հոգի (երեքը Տրունիներից): Արաբական հրամանատարությունը կամենում էր այնպես անել, որպեսզի Հաբավային Հայաստանի և Բարձր Հայքի ապստամբները չմիանան: Այս նկատառումով արաբները դուրս են գալիս Ապահունիք և փակում ապստամբների ճանապարհը³⁹: Դրա հետևանքով Հաբավային Հայաստանի և Բարձր Հայքի ապստամբները չկարողացան միանալ, և արաբները զատ-զատ հաշվեհարդար տեսան նրանց հետ: Ապստամբության պարտությունը Վասպուրականի զինական ուժերի ջլատումն էր, բայց ոչ իսպառ ոչընչացումը: Արաբները, գրում է պատմագիրը, «եւանէին ի վերայ ամրոցաց և նուաճէին զապաստանեալսն յամուրսն կոչել ի խաղաղութիւն, և տային գիր երդման և իջոցանէին յամրոցացն»⁴⁰: Այսպիսով, ապստամբ հայերը ստիպված տեղի են տալիս:

775 թ. Բյուզանդիան հաջող կռիվներ էր մղում արաբների դեմ⁴¹: Հայ որոշ իշխաններ ժամանակավորապես հակվում են բյուզանդացիների կողմը: Արաբների դեմ կռվող բյուզանդական երեք զորապետներից մեկը Վասպուրականի (Անձևացիքի) իշխան Տաճատն էր (Գրիգորի որդին), որը հետագայում անցավ արաբների կողմը:

Բագրևանդի ճակատամարտից հետո Մուշեղ Մամիկոնյանի դուստրերը և երկու որդիներն ապաստանեցին Վասպուրականում: Սակայն Արծրունյաց

³⁶ Նույն տեղում:

³⁷ Նույն տեղում:

³⁸ Նույն տեղում, էջ 147:

³⁹ Նույն տեղում, էջ 147—148:

⁴⁰ Նույն տեղում, էջ 152:

⁴¹ Г. Гельцер, Очерк политической истории Византии, С. Петербург, 1912, стр. 67—70.

իշխան Մեհրուժանը, վախենալով, որ նրանք ապագայում կդառնան վախճալովոր ախոյաններ, արաբներին սիրաշահելու միտումով նրանց սպանել տրվեց։ Վարդան պատմիչը գրում է, որ Մեհրուժան Արծրունին Մամիկոնյան եղբայրներին սպանել տվեց այն պատճառով, «որպէս թէ ի պատճառս հօր նոցա եղև աղէտն մեծ»⁴²։ Մուշեղ Մամիկոնյանի դուստրերից մեկը կամովին ամուսնացավ մահմեդական ամիրա Զահահֆի հետ, որպեսզի զորավիգ ունենա ընդդէմ հայ իշխանների։ Ամուսինը, որին ի միջի այլոց խալիֆայությունը չէր ճանաչում, բախվեց ոչ թե Արծրունիների, որոնք էին սպանել Մուշեղի որդիներին, այլ Բագրատունիների հետ։ Արծրունիներն այս շրջանում հետեւելով Բագրատունիներին, հակվում են դեպի արաբները և ամրապնդում իրենց դերակալությունը Վասպուրականում։ Քաղաքական կողմնորոշման նույնությոնը բնականաբար հետագայում հիմք էր դառնալու Բագրատունիների և Արծրունիների մերձեցման համար։ Եթե Արծրունիների դործունեության շառավիղը դուրս չէր դալիս Վասպուրականից, ապա Բագրատունիները հետամտում էին իրենց գերիշխանության տակ ամբողջ Հայաստանի քաղաքական միավորման նպատակ։ Վասպուրականում Արծրունիների գերիշխանությունը փաստ էր, որի հետ Բագրատունիները չէին կարող հաշվի չնստել։ Մյուս կողմից՝ Վասպուրականի վերածվելը քաղաքական միահարմարմանի ուժեղացում էր Բագրատունիների դիրքերը։ Վասպուրականում Արծրունիների տիրապետությունը ճանաչում են ոչ միայն Բագրատունիները, այլև խալիֆայությունը, որովհետև Արծրունիները հակվում են արաբների կողմը։ Ուշագրավ է, որ երբ Արմինիայի ոստիկան Օթմանը 785 թ. պաշտոնազրկվեց, նոր ոստիկան խուզայմա իբն խազիմին ընդառաջ գնացին նաև Արծրունի իշխանները, որոնցից Ղևոնդը հանվանե հիշում է Համազասպին, Սահակին և Մեհրուժանին⁴³։ Սակայն նոր ոստիկանը հայ նախարարներին բանտ նետեց և ամբաստանեց խալիֆի առջև, որից նույնիսկ նախարարներին մահապատժի ենթարկելու հրաման ստացավ։ Մահապատժից փրկվեց միայն Մեհրուժանը, այն էլ հավատուրացության գնով։ Դա, ըստ Ղևոնդի, կատարվեց 784 թ.։ Ստեղծված ծանր պայմաններում Վասպուրականի հայ ազգաբնակչությունը կրում է նորանոր տառապանքներ։ Հայաստանում, գրում է պատմիչը, «ոչ ոք էր տէր ընչից իւրոց. այլ առհասարակ վարէին յաւարի։ Եւ բազումք ինքնակամութեամբ թողուին զհօտս և զանդեայս և գնային փախստական վասն ոչ բերելոյ զծանրութիւն աղետիցն...»⁴⁴։ Յուսուֆ ոստիկանի օրոք (787) նիզարի ցեղախմբից Հայաստան տեղափոխվեցին նոր արաբ զաղթականներ։ Մյուս կողմից՝ բնիկ հայ բնակչությունը, շահագործելով ծանր պայմանները, լքում է հայրենի երկիրը։ Օբայդուլահ ոստիկանի օրոք (788—790) Վասպուրականի Արտազ գավառը գրեթե դատարկվեց հայութունից։ Հայ բնակչությունը Համամ Ամատունու, նրա հոր՝ Շապուհի և ուրիշ նախարարների առաջնորդությամբ զաղթեց Բյուզանդիա (Խաղտիք)։ Գաղթողների թիվը Ղևոնդը հաշվում է ավելի քան 12 հազար, «հանդերձ. կանամբք և մանկտեալ»⁴⁵։ Գաղթը կատարվել է հիմնականում Արտազից։

⁴² «Հաւաքումն պատմութեան Վարդանայ վարդապետի», Վենետիկ, 1862, էջ 761։

⁴³ «Պատմութիւն Ղևոնդեայ», էջ 162։

⁴⁴ Նույն տեղում, էջ 168։

⁴⁵ Նույն տեղում։

VIII դ. վերջերն ընդհանրապես ծանր շրջան էին Հայաստանի համար։ Մառը գրում է, որ այս ժամանակ Հայաստանը «ամբողջապես քայքայվեց արաբների կողմից և նախորդ դարերի մշակութային ողջ աշխատանքների պտուղները ոչնչացվեցին»⁴⁶, նույնն էր իրավիճակը նաև Վասպուրականում, որտեղ հայ իշխանները Արծրունիների գլխավորությամբ կարողացան ոչ միայն պահպանել իրենց գոյությունը, այլև գլուխ բերել հույժ ծանր ու դժվարին գործ՝ Վասպուրականի քաղաքական ամբողջացումը, որ հիմնականում հետևանք էր օտար բռնացումների դեմ նահանգի ազնվականության միասնական դիմակայության։ Նոր և ծանր պայմաններում նահանգի միասնությունը շարունակում է մնալ որպես քաղաքական, մշակութային և էթնիկական գոյապահպանման կարևոր միջոց։

ПОЛИТИЧЕСКОЕ ОБЪЕДИНЕНИЕ ВАСПУРАКАНА (VIII в.)

В. М. ВАРДАНЫАН

Резюме

На рубеже VII—VIII вв. Васпуракан представлял собой ряд полувисимых княжеств. До VIII в. в крае ведущую роль играли Багратиды и Рштуниды. Насильственная политика Арабского халифата толкнула феодалов Васпуракана на сплочение. Однако добиться политического объединения в крае не удалось ни Багратидам, ни Рштунидам, ни другим знатым фамилиям. Со второй половины VIII в. дело защиты Васпуракана возглавляли Арцруниды. При Аббасидах Васпуракан оказался в трудном положении: часть нахараров либо сошла с политической арены, либо сплотилась вокруг Арцрунидов. Политическое объединение Васпуракана в те тяжелые времена было важным средством политического, культурного и этнического существования.

⁴⁶ Н. Я. Марр, Кавказский культурный мир и Армения, Петроград, 1915, стр. 37.